

P R I M A R I A

5

COÑECEMENTO DO MEDIO

O libro das preguntas



Galicia




Obradoiro • Santillana

3. O embarazo e o parto



Muller embarazada. Durante o embarazo, o bebé medra e desenvólvese dentro da barriga da nai.



Ó comezo do parto colócanse monitores na barriga da mamá para comproba-la saúde do bebé.

O embarazo

O embarazo é o conxunto de cambios que se producen desde a fecundación ata o nacemento dun novo ser. Os cambios prodúcense no bebé que se está formando e tamén na muller. O embarazo dura nove meses, e durante este tempo o meniño que se está desenvolvendo chámase **feto**.

O feto desenvólvese no interior dun órgano chamado **placenta**. A unión entre o feto e a placenta é o **cordón umbilical**. Por este cordón pasan os alimentos e o osíxeno que o feto necesita para vivir.

Os cambios durante o embarazo

Nos tres primeiros meses, o embarazo non se nota exteriormente. Pouco a pouco o bebé e a placenta van medrando e a barriga da mamá vaise facendo máis grande. Tamén as mamas crecen e se preparan para a lactación.

Ó principio, o bebé é tan pequeno coma un gran de area. Ós **tres meses** pódense distinguir tódalas partes do corpo do bebé: a cabeza, os pés, as mans..., incluso as uñas. Ós **catro meses** xa ten tódolos órganos formados.

Ós **nove meses**, o bebé mide uns 50 centímetros e pesa aproximadamente 3.300 gramos. Está totalmente formado e preparado para nacer.

Preguntas

1. ¿Que é o embarazo?
2. ¿Como se desenvolve o bebé durante o embarazo?
3. ¿Como comeza un parto?
4. ¿Que sucede no parto?



Descubre

O parto

A saída do bebé do ventre da nai chámase parto. No parto, o bebé sae ó exterior pola vaxina da súa nai.

Ó comezo do parto a nai nota cómo o útero se contrae ritmicamente para empurra-lo bebé cara á vaxina. A nai axuda a nacer ó bebé empurrando con forza cos músculos do abdome.

Cando o meniño naceu, córtase o cordón umbilical. O embigo é o sinal que queda da unión entre o cordón umbilical e o bebé.

Placenta. O feto desenvólvese no interior da placenta rodeado de líquido amniótico.

Líquido amniótico

Útero



Cordón umbilical. É a unión entre o feto e a placenta. Por este cordón pasan os alimentos e o osíxeno que o feto precisa para vivir.

¿Por que lles gusta ós bebés o sabor doce?

Tódolos bebés gozan tragando o líquido amniótico mentres crecen na barriga da súa nai. Este líquido ten sabor doce e é o único sabor que coñece un meniño acabado de nacer. Por iso lles gusta o leite, que é doce, e as primeiras papas de cereais.

Ó redor dos seis meses incorpóranse por primeira vez alimentos de sabor salgado, coma os purés de verduras, na dieta dos bebés.



Meniño tomando un biberón de leite.

- ¿Cal é o órgano do sentido do gusto?
- ¿Funciona xa o sentido do gusto dun bebé cando está a medrar na barriga da nai?

Actividades

1

Ordena con números o desenvolvemento dun bebé no embarazo.

- ☐ 1 O bebé é tan pequeno coma un gran de area.
- ☐ 2 Mide uns 50 cm e pesa uns 3.300 g.

- ☐ 3 Ten tódolos órganos formados.
- ☐ 4 Podemos distinguir tódalas partes do seu corpo.

2

Elixe as frases verdadeiras.

- Cando unha muller está embarazada ...
 - a) ... debe facer moito exercicio.
 - ☒ b) ... non debe tomar substancias prexudiciais.
 - c) ... sáenlle grans nas mans.

- O parto comeza cando ...
 - a) ... o bebé se move moi de présa.
 - b) ... a muller vai a un hospital.
 - ☒ c) ... o útero se contrae de forma rítmica para empurra-lo bebé.